

[Тропарь](#) [Кондак](#) [Молитва](#) [Величание](#)
[Акафист святителю Димитрию Ростовскому, чудотворцу](#)
[Канон святителю Димитрию Ростовскому](#)

Тропарь, глас 8-й

Православия ревнителю и раскола искоренителю, / Российский целебниче и
новый к Богу молитвенниче, / списаньми твоими буйх уцеломудрил еси; / цевнице
духовная, Димитрие блаженне, / моли Христа Бога спастися душам нашим.

Кондак


Звезду Российскую, от Киева возсиявшую / и чрез Новград Северский в Ростов
достигшую, / всю же страну сию ученьми и чудесы озарившую, / ублажим
златословеснаго учителя Димитрия, / той бо всем вся написа, яже к наставлению,
/ да всех приобрящет, якоже Павел Христу, // и спасет правоверием души наша.

Молитва

О всеблаженне святителю Димитрие, великий угодниче Христов, Златоусте
Российский, услыши нас, грешных, молящихся тебе, и принеси молитву нашу к
Милостивому и Человеколюбцу Богу, Емуже ты ныне в радости святых и с лики
Ангел предстоиши! Умоли Его благоутробие, да не осудит нас по беззакониям
нашим, но да сотворит нам по милости Своей. Испроси нам у Христа и Бога
нашего мирное и безмятежное житие, здравие душевное и телесное, земли
благородие и во всем всякое изобилие и благоденствие, и да не во зло обратим
благая, даруемая нам от Щедрого Бога, но в славу Его и прославление твоего
заступления. Даруй нам Богоугодно прейти поприще временной жизни; из бави
нас воздушных мытарств и наста ви нас на путь, ведущий в селения праведных,
идеже празднующих глас непрестанный, зрящих Божию Лица неизреченную
доброту. Церковь Святую от расколов и ересей сохрани, верных же укрепи,
зablуждающих обрати и всем даруй вся, яже ко спасению и славе Божией
подобаящая; Отечество твое сохрани от врагов ненаветно, но поборай оружием
Крестоноснаго воинства. И подаждь нам всем твое архипастырское и святое
благословение, да оным осеняеми, избавимся от козней лукаваго и избегнем от
всякие беды и напасти. Услыши моление наше, отче Димитрие, и моли
непрестанно о нас Всесильнаго Бога, славимаго и поклоняемаго в Трех
Ипостасех, Емуже подобает всякая слава, честь и держава во веки веков. Аминь.

Величание

Величаем Тя, / Святителю, отче наш Димитрие, / и чтим святую память твою / ты
бо молиши за нас / Христа Бога нашего.



Акафист святителю Димитрию Ростовскому, чудотворцу

Кондак 1

Возбранный чудотворче и изрядный угодниче Христов, многоцелебный чудес источниче, неисчерпаемая благодати ходатаю, теплый молитвенниче, великий святителю Христов Димитрие, яко имеяй дерзновение ко Христу Богу нашему, от всяких нас бед свободы зовущих:

Радуйся, Димитрие, новый и великий чудотворче.

Икос 1

Ангел нравом, аще и человек естеством был еси, святителю Димитрие; от самых бо младых ногтей ум твой, пренебрегши земная, в небесная вперил еси, и плоть нося, о плоти нерадил еси. Темже и вселися в тя Пресвятый Дух, Егоже ты обителищем быти уведевше, похвальная восписуем ти:

Радуйся, незлобием твоим Агнцу, прореченному Исаием, подражавый;

Радуйся, милосердием нищия препитавый.

Радуйся, воздержанием Ангелов удививый;

Радуйся, постом и молитвою плоть твою удручивый.

Радуйся, к подвластный чадолюбивым отцем бывый;

Радуйся, страждущия сердоболием утешивый.

Радуйся, вместо тленных нетленная стяжавый;

Радуйся, небесный человеце.

Радуйся, земный Ангеле;

Радуйся, Духа Святого сосуде избранный.

Радуйся, православия ревнителю;

Радуйся, душепагобных расколов искоренителю.

Радуйся, Димитрие, новый и великий чудотворче.

Кондак 2

Видяще обильную реку чудес и исцелений, от святых твоих мощей истекающую благоговения и радости исполншеся, благодарим Бога, прославляющаго святя Своя, Емуже и о тебе вопием: Аллилуия.

Икос 2

Разум истинного богословия внушая чадом Христовы Церкви, златословесными поучениями утверждал еси; еретичествоующих же раскольников, привлекая к спасительному единомыслию, в заблуждениях обличал еси. За таковое твое о душах наших попечение взываем ти сице:

Радуйся, таиннице Пресвятыя Троицы;
Радуйся, проповеднице неисчетных чудес Божиих.
Радуйся, апостольских преданий блюстителю;
Радуйся, брынских душегубцев победителю.
Радуйся, пламеню, ереси пожигаяй;
Радуйся, грома, соблазняющая устрашая.
Радуйся, свеще, Богом возженная, мрак нечистия разгоняющая;
Радуйся, звезде, путь ко спасению показующая.
Радуйся, тимпане, Божию славу бряцаая;
Радуйся, органе Духа Святого.
Радуйся, православия ревнителю;
Радуйся, душепагубных раколов искоренителю.
Радуйся, Димитрие, новый и великий чудотворче.

Кондак 3

Силою благодати Божия еще во временной жизни приял еси власть, святе Димитрие, недуги исцеляти и бесы изгоняти; по смерти же твоей наипаче прослави тебе всемогущий Бог многими чудотворенми, да вси, взирающе на сие, усердно притекают ко исцелению тобою от недугов телесных, паче же душевных, Богу же вопиют: Аллилуия.

Икос 3

Имея неусышное попечение о спасении душ, вверенных тебе от Бога, святителю Димитрие, пастырски к душеспасительной жизни и словом и самым делом, показуя неленостный подвиг в подражании святым Божиим, непрестанно наставлял еси. Сего ради прими от нашего усердия достойныя похвалы тебе:

Радуйся, пастырю добрый, заблуждающих по горам суемудрия взыскавый;
Радуйся, благий рабе и верный, данный тебе от Господа талант усугубивый.
Радуйся, делателю винограда Христова;
Радуйся благочестия столпе неподвижимый.
Радуйся, твердое забрало Христовы Церкви;
Радуйся, щите, защищаяй благочестие.
Радуйся, мечу острейший, посекаяй злочестие;
Радуйся, непоколебимое православия основание.
Радуйся, твердый каменю веры;
Радуйся, кормило церковное, управляющее верных к тихому пристанищу.

Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 4

Буря ересей от преисподних чрез Ария во Греции возродившаяся, в последняя же лета происками Мартина Арменина чрез брынских скитона начальников в Отечестве нашем возникшая, готова была опровергнуть тишину единыя, Святыя Соборныя и Апостольския Церкви; ты же пастырь добрый, положивый душу твою за овцы, оныя прогнав душепагубныя волки, бурю суемудрия укротил еси, верныя же научил еси Трипостасному Богу взывати: Аллилуия.

Икос 4

Слышаша суемудреннии раскольницы твое к ним изобличение, еже ты, болезнь о сердечном их заблуждении, написал еси, возбесишася зело, и множество из них вместо должнаго исправления адский пламень изрыгнуша на тя; ты же, яко твердый адамант, под ударами злобы и ненависти не изменился еси. Сего ради Церковь Святая блажит тя приветствии сими:

Радуйся, Ангелов сожителю;
Радуйся, Апостолов преемниче.
Радуйся, святителей сопредстольниче;
Радуйся, российский златоусте.
Радуйся, Спиридону, Великому Василию, Григорию Богослову и прочим великим светителям единочестне;
Радуйся, Николаю Мирликийскому и Мелетию Антиохийскому единоправне.
Радуйся, преподобных собеседниче;
Радуйся, монахов и постников наставниче.
Радуйся, мучеников удобрение;
Радуйся, праведных украшение.
Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 5

Боготечная звезда явился еси в течении твоём, еже ты совершал еси, свое устроая спасение; примером же верных души назидая, научил еси благоприятно пети Богу: Аллилуия.

Икос 5

Видевше ангельстии чинове еще во временной жизни великия подвиги твоя во всяком благочестии и чистоте, удивляхуся, прославляюще человеколюбца Бога, немощное человеческое естество подкрепляющаго. Мы же тя, усердно любовию почитающе, чествуем похвалами сими:

Радуйся, луче Трисолнечнаго Света;
Радуйся, светильниче, на свещнице церковном поставленный.
Радуйся, светило, путь правый показующее;
Радуйся, воине Христов непобедимый.
Радуйся, Единосущныя Троицы истинный поборниче;
Радуйся, уста еретическая заградивый.
Радуйся, златословесными усты небесныя истины вещаяй;
Радуйся, вся своя имения по словеси Господню продавый.
Радуйся, единого безценнаго бисера Христа Господа снискавый;
Радуйся, в мале быв верен, над многими поставленный.
Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 6

Проповедник немолчный тайны Пресвятыя, Единосущныя и Неразделимыя Троицы был еси. Сего ради проповедует Россия величия Божия, показанная на тебе, святителю Димитрие, яко приял еси дар целити недуги душевныя и телесныя, да вси единым сердцем и едиными усты воспевает Богу: Аллилуия.

Икос 6

Возсия в возлюбленной Богом души твоей блистающий истиннаго боговедения свет, на освящение и просвещение верных, егоже с сладостию внимающий спасительному учению твоему видяще, верно познаем, яко и в единонадесятый час пришедый, равный с древними святыми и богоносными отцы динарий приял еси. Темже восхваляем тя сице:

Радуйся, вместилище добродетелей;
Радуйся, достойное святыни жилище.
Радуйся, море, нечестие мира потопившее;
Радуйся, крине благоуханный, чудесно процветший.
Радуйся, сокровище медоточных учений;
Радуйся, уневестивый душу твою жениху Христу.
Радуйся, смирения Его истинный подражателю;
Радуйся, иноческую нищету до конца сохранивый.
Радуйся, вшедый с мудрыми в радость Господа твоего;
Радуйся, благовоние Духа Святаго.
Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 7

Хотя достойным образом совершити подвиг, возложенный на тя от Бога, первее укреплял еси душу свою прочтанием житий святых, предполагая себе подражание оным; таже ощутив пользу, из того проистекающую, не обленился еси быти писателем жизни тех, с нимиже ныне в невечернем свете ликуеши, воспевая Богу: Аллилуия.

Икос 7

Новаго тя о нас молитвенника, целителя душ и телес и ходатая нам спасения вечнаго стяжахом; но благодарным сердцем и усты Богу, толикаго чудотворца в наши времена даровавшему, достойно воспета не могуще, тебе, святителю и великий угодниче Христов Димитрие, похвальная дерзаем приносите сице:

Радуйся, всем скорбящим приятное попечение;
Радуйся, скорый от всякия болезни и безмездный врачу.
Радуйся, злых помыслов прогонителю;
Радуйся яко твоими молитвами слепни прозреша.
Радуйся, яко твоим ходатайством хромые и безнозии ходити начата;
Радуйся, яко тобою от многих бесове отгнашася.
Радуйся, яко твоим заступлением расслабленнии исцелеша;
Радуйся, ломотныя и опухлыя уврачевавый.
Радуйся, трясавичных и огневичных болезней целебниче;
Радуйся, от неисцельных водяных и каменных болезни здрави возставивый.
Радуйся, православия ревнителю;
Радуйся, душепагубных расколов искоренителю.
Радуйся; Димитрие, новый и великий чудотворче.

Кондак 8

Странно недугом неверия одержимым видети, како в мертвенном теле и тленном возможно ангельское проходити житие непреткновенно, и по успении от единого с верою прикосновения к телу, нетлением почтенному, дивная совершаются; мы же на тебе, святителю Димитрие, новое чудес всемогущаго Бога сбытие слышаще и видяще, молитвами твоими врачуеми, взываем Ему: Аллилуия.

Икос 8

Весь распалился искреннею любовию к Богу, всего себе предал еси воле Его; и вся вещественная и тленная вменив уметы быти, духом, душою и сердцем возжелел еси наслаждаться лицезрением Божиим; но ныне вся потребная тебе в вечность испросил еси, не забуди и нас, требующих твоего заступления и ходатайства, да тем паче похвальная восписуем ти:

Радуйся, Богу совершенно угодивый;
Радуйся, венец бессмертной жизни получивый.
Радуйся, насыщаяся Божия благодати;
Радуйся, пророки за объяснение их писаний похваленный.
Радуйся, апостолы за последование их стопам убаженный;
Радуйся, святители за единомысленную с ними ревность прославленный.
Радуйся, мученики за списание страданий их увенчанный;
Радуйся, преподобными за подражание им во всяком благочестии и чистоте постом и молитвою к лику их причтенный.
Радуйся, праведники за высочайшее твое смирение и труды превознесенный;
Радуйся, от всех святых радостными приветствиями усретанный.
Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 9

Всякия беды, скорби и напасти избавляй нас, святе Димитрие, твоими к Богу теплыми молитвами и потщися даровати нам временная благая, к жизни потребная, и вечная, да с тобою купно в селении праведных воспоем Богу: Аллилуия.

Икос 9

Витийство человеческое не возможет изрещи довольно количество благодати Божия, излианная на тебе, святе Димитрие; но любовью твоею побеждаеми, дерзаем воспевати тебе:

Радуйся, насадителю благих;
Радуйся, искоренителю злых.
Радуйся, чистоты селение;
Радуйся, печальных утешение.
Радуйся, отчаянных заступление;
Радуйся, сирот питателю.
Радуйся, обидимых предстателю;
Радуйся, преподобия и правды истинный хранителю.
Радуйся, пресветлый столпе облачный, просвещали множеством чудес;
Радуйся, облаче росоносный, погашали пламень страстей.
Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 10

Спасти хотя душу, о плоти твоей нерадил еси, но постом, бдением, молитвами и непрестанными трудами плоть твою удручил еси, яко в тимпане, во умерщвлении телесе благоприятно Богу вопия: Аллилуия.

Икос 10

Стена еси, ограждающая от всех бед, усердно ты в помощь призывающих, святителю Димитрие, яко во всех странах Российской державы ясно проповедаются обильныя чудеса, бывшая у цельбоноснаго твоего гроба. Сего ради ублажаем тя сими:

Радуйся, чаше, источающая нам елей милости Божия;
Радуйся, больных исцеление.
Радуйся, немощных подкрепление;
Радуйся, страждущих скорая помощь.
Радуйся, претыкающихся о камень соблазна наставниче;
Радуйся, обидимых заступниче.
Радуйся, омраченныя просветивый;
Радуйся, просвещенныя утвердивый.
Радуйся, расточенная собравый;
Радуйся, к небесному немерцающему свету направивый.
Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 11

Пение немолчное принесл еси Пресвятей Троице, святе Димитрие, ово мыслию, ово гласом, ово словом, ово благотворении. И ныне предстоя Престолу Божественному, моли о воспевающих о тебе: Аллилуия.

Икос 11

Светозарное твое учение, ум небесный являющее, подтверждаемое ныне нетлением мощей твоих и множеством чудес, явное и действительнейшее средство дарова человеколюбивый Бог на обличение еретичествующих и на утверждение православных; ныне святым и медоточным твоим учением упоеннии, с благодарным чувствием вопием та:

Радуйся, учителю премудрый;
Радуйся, пастырю предивный.
Радуйся, исповедниче непоколебимый;
Радуйся, око слепым.
Радуйся, нога хромым;
Радуйся, рука безпомощным.
Радуйся, главо, наполненная небесным учением;

Радуйся, ластовице богоглаголивая.
Радуйся, источниче златострунный;
Радуйся, цевнице духовная.
Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 12

Благодать, данная ти от Бога, целити недуги телесныя и душевныя, святе Димитрие, созывает отвсяду почитающих явление твое и чающих тобою получитье просимое от Бога. Темже и мы, припадая со умилением, молим тя, избави нас от зол греховных, да благодарно Ему воспоем: Аллилуия.

Икос 12


Поюще твоя чудеса, святителю Димитрие, восхваляем Бога, даровавшего тебе таковыя силы исцелений. Ты же не возгнушайся нас, грешных и недостойных рабов Его, но услыши нас, во умилении вопиющих тебе сице:

Радуйся, света непреступнаго зрителю;
Радуйся, жениху Христу светел светильник сохранивый.
Радуйся, душевредное уныние от себе истребивый;
Радуйся, жестоким путем райских селений достигнувый.
Радуйся, нищетою богатая стяжавый;
Радуйся, смирением получивый высокая.
Радуйся, теснотою пространство вечное снискавый;
Радуйся, поношением Христа ради вечную с ним славу приявый.
Радуйся, от Святыя Троицы увенчанный;
Радуйся, не гаданием, но лицом к лицу Бога созерцали.
Радуйся, православия ревнителю;
Радуйся, душепагубных расколов искоренителю.
Радуйся, Димитрие, новый и великий чудотворче.

Кондак 13

О великий святителю Димитрие, расколов и ересей искоренителю, прими сие похвальное пение, и моли Всемогущаго умирить мир и спасти души наша, всех православно Триипостасному Богу вопиющих: Аллилуия.

Сей Кондак глаголи трижды, а потом Икос 1: Ангел нравом, аще и человек... и Кондак 1: Возбранный чудотворче...



КАНОН СВЯТИТЕЛЮ ДИМИТРИЮ РОСТОВСКОМУ

Тропарь, глас 8-й

Православия ревнителю и раскола искоренителю, Российский целебниче и новый к Богу молитвенниче, списаньми твоими буйх уцеломудрил еси; цевнице духовная, Димитрие блаженне, моли Христа Бога спастися душам нашим.

КАНОН, ГЛАС 6-й

Песнь 1

Ирмос: Яко по суху, пешешествовав Израиль по бездне стопами, гонителя фараона видя потопляема, Богу победную песнь поим, вопияше.

Припев: [Святителю отче наш Димитрие, моли Бога о нас.](#)

Со Ангельскими чиноначалиями предстояй Святей Троице, великий иерарше Димитрие, моли о нас грешных, да получим грехов оставление.

[Святителю отче наш Димитрие, моли Бога о нас.](#)

Постничеством и воздержанием всяким поработивый тело духу, и тем соделавый нетление и цельбоносную силу и брэнному веществу твоему, научи и нас, отче святыи, Богу, а не мамоне работати.

Слава: Управляя паству, вверенную тебе от Началопастыря Христа, и отгоняя душевредных волков от Христовы ограды твоими Богодухновенными учении, назирай и ныне, святителю Димитрие, да не како суемудренныя расколы возмутят тишину церковную, но паче моли Человеколюбца Бога, да вскоре вси едиными усты и единым сердцем восхвалим Его благоутробие.

И ныне: Избранну и Всечисту разумев Тя Сын Божий, Всенепорочная, Сын Твой бысть, сынов сотвори благодатию, Богородицу Тя чтущия.

Песнь 3

Ирмос: Несть свят, якоже Ты, Господи Боже мой, вознесый рог верных Твоих, Блаже, и утвердивый нас на камени исповедания Твоего.

[Святителю отче наш Димитрие, моли Бога о нас.](#)

Утвердився на камени веры Христовы, тверд пребыл еси во исповедании Православия и злочествующих непрестанно обличил еси.

[Святителю отче наш Димитрие, моли Бога о нас.](#)

Обличая, моля, советуя, не преставаеши призывати заблуждших овец от Христова стада, аще и не вси послушаша гласа твоего.

Слава: Сынов Церкви, непоколебимо пребывших во объятиях ея, ободрял еси, и мы, со сладостию внимаю учению твоему, вопием: несть свят паче Бога нашего.

И ныне: Избавляющаго человеки преслушания и Кровию Своею омывшаго первородный грех Адамов, Чистая и Всенепорочная, родила еси.

[Господи, помилуй \(трижды\).](#)

Седален, глас 8-й

Исцеления и чудеса, истекающая от чудоточных мощей твоих, святителю Димитрие, радуют верных сердца и возбуждают любовь пети тебе: радуйся, отче, Российская похвало.

Слава: и ныне: Едина истинная христиан Покровительнице, всяких лютых обстояний, бед и скорбей нас избави, и мольбами Твоими спаси души наша.

Песнь 4

Ирмос: Христос моя сила, Бог и Господь, честная Церковь Боголепно поет, взывающи, от смысла чиста о Господе празднующи.

Святителю отче наш Димитрие, моли Бога о нас.

Измлада воспитан в добром научении, остроту ума твоего не на суемудренная умствования обратил еси, святителю Димитрие, но на созидание и утверждение православных, на обличение же и обуздание еретиков: темже и явился еси достойный апостольскаго престола наместник.

Святителю отче наш Димитрие, моли Бога о нас.

Неистошимое врачевство источают многоцелебнии святии мощи твои, и иже верою к ним притекающия обретают от злых избавление,

Слава: За любовь, яже ко Христу имел, прославился еси даром чудес и исцелений, сего ради поклоняемся тебе и молим тя, яко угодника и друга Божия, да помянеши нас во святых твоих к Богу молитвах.

И ныне: Моли о нас Человеколюбца Бога, Пресвятая Владычице, да не помянет беззаконий наших, но да сотворит с нами по милости Своей.

Песнь 5

Ирмос: Божиим светом Твоим, Блаже, утренюющих Ти души любовь озари, молюся, Тя ведети, Слове Божий, истиннаго Бога, от мрака греховнаго взывающа.

Святителю отче наш Димитрие, моли Бога о нас.

Сохрани, святителю Христов, отечество твое ненаветно от врагов и даруй на сопротивных победу и одоление.

Святителю отче наш Димитрие, моли Бога о нас.

Огради нас, угодниче Божий Димитрие, от всех козней лукаваго диавола, да не преткновенно возможем преити путь жития сего во исполнении заповедей Божиих.

Слава: Разжени, отче Димитрие, тьму греховную от душевных очес наших и просвети нас познанием воли Божия, да во свете заповедей Его совершим добре течение наше.

И ныне: Дево Непорочная, рождающая Свет истинный, облистай нас светом Божественным во спасение наше.

Песнь 6

Ирмос: Житейское море, воздвигаемое зря напастей бурей, к тихому пристанищу Твоему притек, вопию Ти; возведи от тли живот мой, Многомилостиве.

Святителю отче наш Димитрие, моли Бога о нас.

Воззри милосердным оком, святителие Христов, на волнение греховное, нас обуревающее, и управи плавание наше в тихое пристанище милосердия Божия.

Святителю отче наш Димитрие, моли Бога о нас.

Буди нам дорый кормчий, отче Димитрие, и не остави нас погибнути во грехах наших, но в нихже сам, яко человек искушаем был, помози и нам, искушаемым.

Слава: Святе Димитрие, буди о нас заступник и ходатай ко Многомилостивому Богу, да возведет от тли живот наш.

И ныне: Устами и сердцем величаем Тя, Матерь Божию: Ты же, примирившая Богу весь род человеческий, не отрини нас от Твоего заступления.

Господи, помилуй (трижды).

Слава, и ныне:

Кондак, глас 4-й

Звезду Российскойскую, от Киева возсиявшую, и чрез Новград Северский в Ростов достигшую, всю же страну сию ученьми и чудесы озарившую, ублажим златословеснаго учителя Димитрия: той бо всем вся написа, яже к наставлению, да всех приобрящет, якоже Павел, Христу и спасет правоверием души наша.

Икос

Праведным о кающихся на Небеси, нам же, грешным, на земли о тебе, праведниче Димитрие, подобает возрадоваться: яко новаго тя к Богу молитвенника о нас стяжахом, егоже достойными похвалами ублажающе, сие от радости зовем: радуйся, Ростовская похвало, и всея России похваление.

Песнь 7

Ирмос: Росодательну убо пещь содела Ангел преподобным отроком, халдеи же опаляющее веление Божие мучителя увеща вопити: благословен еси, Боже отец наших.

Святителю отче наш Димитрие, моли Бога о нас.

Христова ради смирения, образ смирения явился еси, святе Димитрие, и мне подаждь не в гордости, но во смирении взывати: благословен еси, Боже отец наших.

Святителю отче наш Димитрие, моли Бога о нас.

Воздержанием покорил еси тело духу твоему, святителю Димитрие, подаждь и мне в воздержании пожити, да нескверными устами воззову: благословен еси, Боже отец наших.

Слава: Учениями твоими, отче Димитрие, управляеши мысли наша, и мы, подражая тебе, воспеваем Богу: благословен еси, Боже отец наших.

И ныне: Безначальнаго Бога зачала еси во чреве Твоем, Пречистая Дево, Егоже поюще, зовем: благословен Бог отец наших.

Песнь 8

Ирмос: Из пламене преподобным росу источил еси и праведнаго жертву водою попалил еси: вся бо твориши, Христе, токмо еже хотети. Тя превозносим во вся веки.

Святителю отче наш Димитрие, моли Бога о нас.

Ты был еси строитель спасения нашего, Димитрие, вопия всем послушающим учения твоего: превозносите Христа во веки.

Святителю отче наш Димитрие, моли Бога о нас.

Богомудрый иерарше, всеблаженне Димитрие, милостивою и человеколюбною к нам любовию моли о нас Человеколюбиваго Бога, Егоже превозносим во вся веки.

Слава: Зловредное мудрование раскольников испровергл еси, святе Димитрие, верная же наставил еси пребыти твердым во истинней вере, превозносите, вопия, Христа во веки.

И ныне: Преестественное и чудное Рождество Твое, Дево, воспеваем благочестно, превозносяще Христа во вся веки.

Песнь 9

Ирмос: Бога человеком невозможно видети, на Негоже не смеют чини Ангельстии взирати; Тобою бо, Всечистая, явися человеком Слово воплощено, Егоже величающе, с Небесными вои Тя ублажаем.

Святителю отче наш Димитрие, моли Бога о нас.

Наслаждался, отче, вечныя жизни, о нейже усердно подвизался еси, моли и нам достигнути оныя.

Святителю отче наш Димитрие, моли Бога о нас.

Аще и преселился еси от нас на Горняя, святителю Димитрие, обаче духом пребываеши с призывающими тя, научая и укрепляя ходити по стезе спасительных заповедей Божиих.

Слава: Явился еси благочестия светильник всесветлый, ритор изящнейший и православных архиереев удобрение: тем ты сердечною любовью достойно величаем.

И ныне: Богородице Дево, Егоже родила еси Человеколюбца Бога, моли со святителем Димитрием, да спасет души наша.